



## 懺悔

我實在真毋願行上這條不歸路，翁猶緣投，囡猶細漢，爸母猶健在，這欲叫我怎樣離開跤？七爺八爺請你莫相趕，牛頭馬面你莫嚇(hènn)驚，ooh！耶穌你嘛來矣，我知影天國近矣！平常我信你神愛世人，猶毋過這時陣看著你，我是驚甲必必掣(phih-phih-tshuah)；我哪會舞甲這款地步咧？

人講第三查某困食命，這敢有影？有啦！傳說中的水雞土仔個某就是，心肝好腹腸闊袂計較，天公嘛來鬥相共，尾仔過著富裕的好日子；西方三姐妹囡仔古嘛是，大姊嫁予國王做pháng的師傅，二姐嫁予國王的總舖師，逐工食腥臊，第三个嫁予國王，生嬌嚙嚙的囡仔，過快樂的日子。現實中阮大嫂嘛袂稔，人巧、讀冊順利，考著師專，頭路便便，閣嫁著好翁，食好做輕可，好命ni-ni；做老師二十外冬，會使退休矣，閣去讀碩士，是上新的台文所，研究台語óo！伊實在是我的好模範。平平是第三查某困，哪會天差甲地？這著愛怪我一走錯步步錯啦！

彼年師專考無牢，袂曉計畫去補習一冬，堅持讀新娘學校——家專幼兒保育系，雖然厝裡散赤，父母疼我，予我開大錢，畢業揣頭路，才知代誌大條矣！固定的頭路歹揣，做囡仔頭王月給低，做國小仔代課老師雖然逐年愛考試，毋過放假固定，薪水袂稔，自按呢做幾若年，這是我無煩無惱、無憂無愁查某囡仔時代。啊！實在足懷念，足懷念的。唯一的致命傷是無在額，hông看輕。

「男大當婚，女大當嫁」我去sànn著同事介紹的「科技新貴」男朋友，我誠欣賞伊的電腦功力，誠恰意伊的緣投好看，除了遊山玩水，開講惹街之外，逐擺伊若來，阮攏關仔房間仔內，tshih-buh-tshih-tshuh袂厭siān，父母攏講：「按呢毋好啦！」「按呢傳出去足稔聽。」

愛著較慘死，親情朋友、兄弟姐妹並無贊同，干焦我目調去予蚵仔肉糊去，堅持綴時行——自由戀愛。嫁了才知苦，大家真khiàng跤，先生是有孝，毋過我講話無人信篤，佇厝裡無地位，因為我無穩定的工課(khang-khùe)，結婚前的頭路大家(ta-ke)叫我辭辭掉，兩翁某同齊拍拚(phah-piànn)電腦事業。翁婿是做工程師的料，人古意，功夫好，修理電腦逐家攏呵咾(o-ló)。毋是做生理的範，喙水(tshùe-súi)稔，歹勢(pháinn-sè)收數(siàu)，景氣好猶拍會過，景氣稔，就負債累累。我真後悔，同期的代課老師攏浸甲變正式的，干焦我無堅持，這陣才hông看無目地。

彼暗，已經無氣力閣擋落去，跤瘦手軟倚袂牢，倒佇眠床楞(gōng)suah-suah，目睷花花，瓠仔看做菜瓜，一人看做兩人。欲看醫生囊袋仔貯磅仔，開喙共大兄借，煞無法度看清楚手摺簿仔的數字，咻阮翁聽電話，伊按呢投：「照我十外年來的觀察，伊是無病，干焦欠做；有頭路罔做，錢罔趁就好矣，你知影我這陣咧創啥？煮菜啦！」

唉！我有話無地講，有苦無地啟(tháu)，當初我堅持欲嫁，閣大食袂曉算，俗人綴(tuè)時行，分期付款thuann納一間厝，佇懸懸的十八樓，後頭無一个行跛到，這嘛莫怪，這款大代誌，我攏毋捌共厝裡的爸母、兄弟姐妹參詳。十外年前，賣厝的建商真gâu促銷，為著囡仔欲娶雞娃仔，圍倚去鬥鬧熱，煞耳空輕，擋袂牢業務仔的鼓吹，大主大意訂一間厝。唉！無彼號尻川(kha-tshng)就毋通食彼號瀉藥。自按呢重重的殼共我哲(teh)甲袂翻身、袂反引、袂喘氣。趁來的袂赴thūn平這空無底的錢空，我日也做暝也做，猶負債累累，散甲鬼強欲掠去，這款艱苦鬱卒無人知，親情朋友無聯絡，外家嘛真少轉去。講啥物愛做工課，我是愛錢，毋是愛做啦！

鐵拍的身體嘛袂堪得身體俗心理長期的折磨，頭眩眩叫是欠血，食補嘛是無彩工，不時嘛楞suah-suah。跛跛叫是去uáinn著，人報去予真gâu的拳頭師掠掠咧，去倒死、煞袂行路。後頭的阿媽，逐擺看著逐擺唸：「哪會遮瘦啦！是攏無食hiooh？趁錢有數，性命愛顧ooh！」我的困苦是無法度講起，只有笑笑仔共伊應：「食菜較健康，大箍病較濟。」

拜六仝款起來款規家伙的早頓，倚袂在，目睷前一片烏，煞un落去。醒來已經是佇加護病房。自來我是真勇健，父母毋捌為我的身體操煩過，十外年的婚姻生活，蠟燭兩引燒，病院講我是肺癌第四期移徙到頭殼，癌細胞壓迫著腦神經，我的性命親像風中的燭火，隨時會hua去。ooh！天公伯仔你真gâu創治，我攏遵守天然的上好，青菜水果加減食，肉類加工攏閃避；到尾矣嘛俗人綴流行，人是流行「蒂芙尼」珠寶鑽石，LV名牌包，米奶(BMW)轎車，我咧？我咧？拄著婦女性命的頭號殺手。

心肝寶貝我的困，原諒阿母無法度陪恁大漢，共恁遮風避雨。緣薄的翁，原諒我佇人生路途中提早落車，我的阿爹阿娘，我的兄弟姐妹，我先來走，恁攏免悲傷，予我無掛礙。

啊！無緣的囡仔，恁來矣。唉！是怨恨阿娘共你提掉，我的苦閣講嘛無效。我綴恁去、綴恁去！人生若眠夢，夢醒變成空，我的情、我的愛、我的恩、我的怨，一切的一切攏隨微微仔風，霎霎仔雨，四處飄散，無影無蹤。

## 創作理念

少年著癌大不幸

現代人健康的大敵人——癌症，tài著若像予人判死刑；事業、戀愛、婚姻、生困嘛是現代人不可避免的代誌。舊年細姑仔著癌來過身，猶少年ni-ni；伊的心肝內一定有滿腹辛酸、滿腹的苦楚，嘛有滿腹未了的心願。

為怎樣伊遮緊就來離開？一定是生活壓力。我用第一人稱來創作、來剖析伊的痛苦，行袂開跛、閣不得不走的苦衷。

陳素經

彰化縣田中國小教師

